

Uunga siunnersuut: Inuussutissarsiummik ingerlataqarneq pillugu Inatsisartut inatsisaat nr. xx, xx. xx 2015-imeersoq.

(Inuussutissarsiornermut, Suliffeqarnermut, Niuernermit Nunanullu Allanut Naalakkersuisoq)

Saqqummiussissut

(Inuussutissarsiornermut, Suliffeqarnermut, Niuernermit Nunanullu Allanut Naalakkersuisoq)

Siullermeerinnineq

2014-imi upernaakkut ataatsimiinnermi unammilleqatigiinnermut inatsit nutaaq Inatsisartut akueraat aammalu tuniniaanissamik nittarsaassisarneq aamma nalunaaqutsersuisarneq pillugit Inatsisartut inatsisissaattut siunnersuutit, ataatsimiinnermi matumani aappassaaneerseqartussat, Naalakkersuisut saqqummiuppaat.

Inuussutissarsiummik ingerlataqarneq pillugu Inatsisartut inatsisissaattut siunnersuut maannakkut Naalakkersuisut sinnerlugit saqqummiussara, inatsisissatut siunnersuutit taasama marluusut taakkua siunertaasa assinganik siunertaqarpoq, tassalu namminersortut aamma pisortat suliaassarfiini unammilleqatigiinnermik naammassisaqarsinnaanermillu siuarsaanissaq. Atuisartut pisisartullu illersorneqarnissaat aamma unammilleqatigiinneq pilugit inatsisini ataatsimoortuni unammilleqatigiinneq taamaalillunilu akigititat pitsaanerusut aamma atuisartut pisisartullu illersorneqarnissaat, qulakkeerseqassapput.

Inuussutissarsiummik ingerlataqarnermut inatsimmi atituumik atuuffeqartumi atuuttumi Kalaallit Nunaanni niuerfinni suliaqarsinnaanermut piumasaqaatit sukannersut arlallit aalajangersarneqarput. Maleruagassani taamaattuni akigititat qaffasinnerunerannik malitseqartumik unammilleqatigiinneq killilersimaarneqarpoq. Tamanna aamma inuussutissarsiornermi avatangiisini matoqqatitsivoq, unammilleqatigiinnermut killiliisumik, akigititanillu isumaqatigiissuteqarnissamut periarfissiisumik, tamannalu ajoraluartumik inuiaqatigiit aningaasaqarnerannut ajoqutaasumik ilungersunartunik pisoqarfiusartoq takusarparput.

Inuussutissarsiummik ingerlaqataqarnissamut inatsisip atuuffissaattut siunnersuutaasut, siunissami nioqutissanik ulluinnarni atugassanik tuniniaanermi namminersorluni inuussutissarsiummik ingerlataqarnermut taamaallaat atuutissapput. Aammalu tuniniaaneq aallaaviatigut niuertarfimmit aalajangersimasumik sumiiffeqartumit ingerlanneqartassasoq

piumasaqaat atorunnaarsinneqarpoq. Taamaalilluni inatsisissatut siunnersuummi siunertaavoq niuernermit ilusiliinerit nutaat, nutaaliorfiusut ineriartortinneqarnissaannut periarfissaqalersitsinissaq, taamaalilluni ilaatigut aallarniisutut suliaqartut nioqqutissaatiminnik tuniniaanissamut pitsaanerusunik periarfissaqalissallutik.

Atuisartut pisisartullu illersorneqarnissaat qulakkeerniarlugu siunnersuutigineqarpoq niuertut, suliffeqarfiup GER normua aammalu piginnittup aqqa najugaalu ersarissuutillugit, tamatigut ersarissumik allagartaliisassasut kiisalu piumasarineqartillugu paasissutissat taakkua pisisartunut tunniuttassagaat. Tuniniaavinnit angallattakkanit, quersuarmit tuniniaanerni, niuffaffinni tuniniaanerni, saqqummersitsinerni aamma nuisitsivinni tuniniaanermut atatillugu paasissutissanut maleruagassat sukannernerusut atuutsinneqalissasut siunnersuutigineqarpoq, taamaalilluni paasissutissat taaneqartut pisisartunut tunniunneqartarnissaat pisussaaffiussalluni.

Inuussutissarsiummik ingerlataqarnermut inatsimmi atuuttumi ingerlatseqatigiiffiit nunanit allaneersut, aalajangersimasumik sivisussuseqartumik inuussutissarsiutitik suliaqarnermik ingerlatsiniartut immikkoortortaqrarfiisa nalunaarsorneqartarnissaat piumasaqaatigineqarpoq. Ingerlatseqatigiiffiup nunanit allaneersup immikkoortortaata nalunaarsorneqartarnera nalinginnaasumik piffissamik isumalluutinillu atuinartarpoq. Inuussutissarsiummik ingerlataqarnermut inatsimmi immikkoortortanut piumasaqaatip atuunnerani aamma aatsitassanut ikummatissanullu inatsimmi suliffeqarfinnut piviusumik kalaallinit pigineqartutut isigineqarnissamut piumasaqaatit sakkukillisarput, taanna aatsitassanut ikummatissanullu inatsit malillugu najukkami immikkoortortami ingerlatsisuuinnarnissamit annertunerusumik piumasaqaateqarfigineqarmat. Inuussutissarsiummik ingerlataqarnermut inatsimmi immikkoortortamut aalajangersakkani piviusumik kalaallit suliffeqarfiini peqataanerup qulakkeernissaanut taarsiullugu, ersinngitsumik akunnermiliuttut suliaqarnissaq ajornarunnaarsinneqarpoq.

Inuussutissarsiornermut Ingerlatseqatigiiffinnullu aqutsisoqarfimmi Kalaallit Nunaanni immikkoortortamik pilersitsinissamut piumasaqaataavoq suliffeqarfiup ingerlatai aalajangersimasumik ataavartussatut annertussuseqassasut, aammalu sivikinnerusumi ataasiaannarluni iliuuseqarluni suliaqarnissaq naammannani. Aamma sanaartugassanut isumaqatigiissuteqarluni annertunerusumik ataasiinnarmik suliaqarneq, ukiut arlallit sivisussuseqartussa, immikkoortortamik pilersitsinissamut piumasaqaatinik naammassinninnissamut naammangilaq. Tassani ullumikkut inuussutissarsiummik ingerlataqarnermut inatsisip aamma ingerlatseqatigiiffinnut inatsisip akornanni akerleriittoqarsinnaavoq, taannalu inatsisissatut siunnersuummi matumani atuukkunnaarsinneqassaaq

Pisortat akileraarutininik akiliuteqarnerit nakkutiginerinik qulakkeerreqarnerinillu suliaqarnissamut tunngatillugu nalunaarsuinissamut pisariaqartitsinerat, inatsisini allani qulakkeerreqarpoq. Taamaalillutik suliffeqarfiit ullumikkut GER-imut nalunaarsuiffimmi aamma sulisitsisunut nalunaarsuiffimmi nalunaarsorneqartussaareerput.

Pisortat sanaartornermut suliassaataannik neqeroortitsisarnerni najukkami suliffissaqartitsinissaq aamma ilinniartunut sungiusarfissaqartitsinissaq neqeroortitsinermut atugassarititaasut ilaattut aalajangersagaqarneq pitsaasunik misilittagaqarfigineqalerpoq. Aatsitassanut ikummatissanullu suliassaqarfimmi IBA-mut isumaqatigiissuteqarnerni ilaatigut najukkami suliffeqarfiit akuutinneqarnissaat aammalu sulisussat nunaqavissut piginnaangorsarneqarnissaannut pikkorissaanernik neqerooruteqarnissaq pillugit piumasqaateqarnerni aamma pitsaasunik angusaqartoqartarpoq.

Taamaalilluni najukkami suliffissaqartitsinerulernissamik aamma ilinniartunut sungiusarfissat amerlanerulernissaannik siuarsaalluni suliniuteqarneq naammassisarfiunerujussuanngorpoq, najukkami inuussutissarsiortut inuussutissarsiummik ingerlataqarnermut inatsit nioqqutissianik illersuiffiusoq maannakkut atuuttutut ittoq aqqutigalugu unammilleqatigiinnermut illersornissaannaannit.

Taamatut oqaaseqarlunga siunnersuut Inatsisartunut piumasuseqartumik suliarineqartussanngorlugu tunniuppara.